

原 书 缺 页

原 书 缺 页

珠船價廿千

安國民泰

無錫縣志安國字民泰富幾畝國居膠山因山治圃植叢
桂於後岡延袤二里餘因自號桂坡好古書畫彝鼎購異
書 又安紹芳字懋卿所居膠山西林廣池十頃帶以華
薄蔚然深靚曲橋飛樓逶迤天矯雜置圖書彝鼎其中名
士過從置酒刻燭至忘日夜 又西林膠山安氏園也嘉
靖中安桂坡穿池廣數百畝中爲二山以擬金焦至國孫
紹芳卽故業大加丹雘與天下名士游賞其中二百年以
來東南一名區也 無聲詩史紹芳自號研亭居士後更
名泰來字未央 錢受之跋高誘注戰國策天啟中二十
千購之梁溪安氏不啻獲一珍珠船也 又跋春秋繁露

金陵本譌舛得錫山安氏活字本校改數百字深以爲快
今見宋刻本知爲錫山本之祖 天祿琳琅初學記板心
上標安桂坡刊每卷標題之下又稱錫山安國校刊安國
所刊書甚夥此書取九洲書屋本翻刻昌熾案安國所刊
有顏魯公集熊朋來集吳中水利書 又史記有大明錫
山桂坡安國民太氏書畫印 又元本博古圖有桂坡安
國賞鑑印 紅豆樹館書畫記徐幼文秋林草亭圖有安
字圓印錫山安氏西林祕玩印墨顛齋圖書印

練市高樓擁白華姑存世學爲專家將軍未奏厓山績且種

東陵五色瓜

茅坤順甫

孫元儀止生

湖錄茅坤字順甫號鹿門歸安人明嘉靖戊戌進士大名

副使以事鐫職歸作島人傳三益先生傳以見志著有白
華樓橐玉芝山房橐年九十卒子翁積國縉維國縉子元
儀字止生號石民佐孫承宗行師歷官提督大將軍旋以
兵譴下獄遣戍漳浦邊事急請募死士勤王爲庸奸所忌
悲憤縱酒而卒 吳興藏書錄茅坤白華樓書目下引湖

錄云鹿門茅先生藏書甲海內練市新構書樓凡數十間
至於充棟不能容其孫大將軍止生編爲九學十部目自
述云九學者一曰經學二曰史學三曰文學四曰說學五
曰小學六曰兵學七曰類學八曰數學九曰外學十部者
卽九學之部而加以世學世學不可以示來世然時王之
制吾先人以茲名於世吾敢忽諸其後攜至白門遭國變

散去

湖上垂綸二十年嚴光佳壻得神仙白陽何似元洲客香火

停雲有兩賢

陸師道子傳

陳道復復甫

無聲詩史陸師道字子傳長洲人進士工部都水司主事
改禮部儀制司請急歸益肆力於學手鈔典籍後先積數
千百卷丹鉛儼然小楷精絕林下踰二十年起補南儀部
召爲繕部郎中擢尙寶少卿告歸卒年六十四先生初號
元洲尋更曰五湖女趙陸卿子適隱士趙宦光子士仁字
文近號承湖昌熾案郡志子傳嘉靖戊戌進士 列朝詩
傳子傳文待詔弟子善詩工小楷古隸旁及繪事人謂待
詔四絕不減趙吳興子傳約略似待詔而風尙標置亦相

亞云 乾隆蘇州府志陳道復初名淳後以字行更字復甫別號白陽山人少從文徵明游所棲曰五湖田舍 又云陳都憲璫宅在大姚都憲孫道復亦居此有閱颿堂碧雲軒 士禮居藏書題跋記中吳紀聞六卷陳白陽山人手校 皕宋樓藏書志湖北茶鹽提舉司新刊漢書一百二十卷有陳道復印陳淳私印 式古堂書畫攷趙子固墨蘭圖陸師道跋有陸氏子傳五芝元澗二印又陳道復梅雪帖有姚里圓印 昌熾案子傳號元洲澗字疑有誤微行門巷有倡條遺事宣和譜玉簫此卽人閒希有本虞山不贈待青瑤

錢穀叔寶

子允治功甫

列朝詩傳錢穀字叔寶少孤貧游文待詔門下日取架上

書讀之以其餘功點染水墨得沈氏之法晚葺故廬讀書
其中間有異書雖病必強起匍匐請觀手自鈔寫幾於充
棟窮日夜校勘至老不衰子允治酷似其父年八十餘隆
冬病瘍映日鈔書薄暮不止功甫歿無子其遺書皆散去
自是吳中文獻無可訪問先輩讀書種子絕矣 明詩綜
小傳允治初名府後以字行更字功甫有少室先生集

明畫錄穀子允治字功甫序字次甫亦善山水 靜志居
詩話叔寶晚葺敝廬曰懸罄室王元美爲賦詩所謂空梁
頗受落月色北窗靜埃涼風眠者也昌熾案劉子威集有
懸罄室記言錢君少學於文徵仲先生爲題其室曰懸罄
言能貧也據此則竹垞晚葺之說未審矣 讀書敏求記

功甫老屋三間藏書充棟白日檢書必秉燭緣梯上下所
藏多人間罕見之本又也是園書目序吳門錢功甫高
士也牧翁釋褐後卽與之交一日語公吾老矣藏書多人
閒未有本子公明日來當作蔡邕之贈我欲閱轉就公借
他年屬纊時公與我料理身後事牧翁喜甚質明往其意
色閔默已不肯踐宿諾矣嗟乎讀書種子習氣未除斤斤
護惜非獨一功甫然也功甫有李師師外傳一卷卽筌翁
云道君在五國城所作從權場中來者功甫歿此書不知
散落何處今雖懸百金購求豈可復見李果徐瑤圃畫
雲閒往哲遺象跋吾吳先賢象爲錢叔寶手筆功甫欲歸
之文文肅公有貲卽以厚利願交於功甫功甫不可文肅

感其意至質其家藏宋槧史記酬之後人爭賢功甫愛
日精廬藏書志書上人集有木記云百計尋書志亦迂愛
護不異隨侯珠有假不返遭神誅子孫不寶真其愚錢叔
寶藏書印記也昌熾案所見懸罄藏書尙有十友齋一印
及中吳錢氏收藏印

廉吏還山賸寢邱買書有俸未爲憂三閒老屋親傳寫惟有

東吳顧可求

顧德育克承

蘇州府志顧祖辰字子武祖蘭宏治戊午鄉舉令樂安於
潛二縣歸隱吳之臨頓里有地數弓竹木翳然結椽三楹
署曰春潛隱蘭子德育家貧好學手錄幾數千卷祖辰襲
祖父餘風老屋三閒破榻竹几雖闐闐中寂若空山閒作

小詩及畫自娛而已 鐵琴銅劍樓書目石刻鋪敘義門

跋曰辛卯得顧可求家鈔本稍正數字顧名德育廉吏榮

甫之子也 又吳中舊事顧德育鈔本跋云隆慶改元丁

卯四月安雅生顧德育記時年六十有五 式古堂書畫

攷周復卿小齋雅致圖顧德育跋有克承安雅堂二印

鳧鼎云回古篆凝茗甌香沸玉河冰至今石室蘭臺裏黍軸

牙籤半武陵

顧從禮汝由

從德汝修

從義汝和

松江府志顧定芳字世安上海人明世宗時召拜御醫子

從禮字汝由工書夏言入閣值世宗狩承天以從禮薦歷

官光祿寺少卿弟從義字汝和善書能詩嘉靖庚戌詔選

端行善書從義名第五授中書舍人隆慶初擢大理評事

家居構玉泓館手摹宋本淳化帖有研山山人詩藁行世
眉公筆記文壽承云在長安時過顧舍人汝由研山齋
見其窗明几靜折松枝梅花作供鑿玉河冰烹茗啜之又
新得鳧鼎奇古目所未見炙內府龍涎香恍然如在世外
不復知有京華塵土 天祿琳琅漢書宋刻本有趙孟頫
象右方上書趙文敏公小象下書長洲陸師道題於顧汝
修芸閣按秦漢印統黃姬水序稱爲東川御醫顧公所纂
厥嗣汝由光祿汝修鴻臚汝和廷評共成之考松江府志
從禮字汝由從義字汝和而不及汝修今卷中有顧從德
印當卽汝修之名也 又新唐書糾繆宋刻本明鴻臚顧
汝修藏有武陵世家顧汝修印顧蒙三朱記唐書直筆新

例同 又資治通鑑興文署板顧從德藏有武陵聯珠印
又新刊唐柳先生文集顧從禮藏有武陵郡圖書記長
印又有子先之印疑爲從禮之別字 嚴元照書春秋張
氏集傳後每冊有顧汝修印 鐵琴銅劍樓書目春秋胡
傳有顧從德印顧從義氏二朱印

四萬卷書百籤畫清森閣似米家船陸沈金馬真無謂東海
歸來誓墓田 何良俊元朗

松江府志何良俊字元朗華亭人居柘林少與弟良傳皆
負俊才時人以二陸方之良俊由貢謁選授南京翰林院
孔目子元之字又元亦以淹雅見稱良傳字叔皮嘉靖十
九年登鄉薦明年登進士禮部郎中 列朝詩傳元朗少

而篤學二十年不下樓以歲貢授翰林院孔目鬱鬱不得志每喟然歎曰吾有清森閣在東海上藏書四萬卷名畫百籤古法帖鼎彝數十種棄此不居而僕僕牛馬走不亦愚而可笑乎有何氏語林四友齋叢說行於世 四友齋叢說序何子少好讀書遇有異書必厚資購之撤衣食爲費雖饑凍不顧也所藏書四萬卷涉獵殆徧 四友齋叢說余家舊藏書幾四萬卷後皆燬於倭近日西亭殿下以爲余家藏書尙存書來假錄恨無以應其求矣 鐵琴銅劍樓書目句曲外史集何元朗鈔本有東海何元朗朱記式古堂書畫攷蘇子美南浦詩帖有何氏元朗紫谿眞逸兩印 又呂寶臣子安學問帖有何氏元朗柘湖居士

兩印 又孫之翰虞侯還帖有橘里清賞何氏元朗兩印

又呂望之蒙恩進職帖有何良俊印陸沈金馬門兩印

又吳雲壑急足帖有何元朗氏兩山二印

昭德先生書滿家自言梨味不如檀禮堂翻定童烏本痛極

優曇頃刻花 晁堧君石 子東吳叔權

千頃堂書目簿錄類寶文堂書目三卷晁堧 四庫提要

堧字君石號春陵開州人宋太子太傅迥之後嘉靖辛丑

進士官至國子監司業其子東吳字叔權嘉靖癸丑進士

選翰林院庶吉士父子皆喜儲藏此本以御製爲首上卷

分總經五經四書性理史子文集詩詞等十二目中卷分

類書子雜樂府四六經濟舉業等六目下卷分韻書政書

兵書刑書陰陽醫書農譜藝圃算法圖誌年譜姓氏佛藏
道藏法帖等十五目其著錄極富雖不能盡屬古本而每
書下閒爲注明某刻亦足以攷見明人板本源流 畿輔
通志誠痛錄明晁東吳撰東吳璵次子弱冠第進士年二
十三卒其父璵手錄其遺文總四卷墨蹟一卷名曰誠痛
錄 亡兒恭彝生於同治甲戌歲體羸而嗜學余每得古
碑精槧助余著錄喜形於色尤留心鄉邦文字某人著某
書或存或佚隨問隨荅瞭如指掌蓋其沈默彊識天性然
也去歲春忽得氣虛腫證百治不瘳至十月朔竟不起年
適二十三歲此章不幸遂成詩讖悠悠蒼天尙何言哉亡
兒在里嘗奉教於曹叔彥內翰內翰嘗詔以輯高密諸經